



KENYATAAN MEDIA

UNTUK SIARAN SEGERA

BELANJAWAN 2022: PELAKSANAAN DISKAUN BAYARAN BALIK PINJAMAN PTPTN

1. Pembentangan Bajet 2022 oleh YB Senator Tengku Datuk Seri Utama Zafrul Tengku Abdul Aziz, Menteri Kewangan Malaysia pada 29 Oktober 2021 (Jumaat) memberikan manfaat kepada peminjam Perbadanan Tabung Pendidikan Tinggi Nasional (PTPTN) melalui pemberian insentif diskaun bayaran balik pinjaman.
2. Diskaun bayaran balik pinjaman PTPTN yang diberikan bermula **1 November 2021 hingga 30 April 2022** adalah seperti berikut:
 - i) **Diskaun 15 peratus** atas baki hutang untuk penyelesaian penuh pinjaman;
 - ii) **Diskaun 12 peratus** untuk bayaran sekurang-kurangnya 50 peratus daripada baki hutang dalam sekali bayaran; dan
 - iii) **Diskaun 10 peratus** untuk bayaran balik melalui potongan gaji atau debit terus mengikut jadual.
3. Pelaksanaan pemberian diskaun bayaran balik adalah seperti berikut:
 - i) Peminjam yang hendak membuat penyelesaian penuh pinjaman atau bayaran balik sekurang-kurangnya 50 peratus daripada baki hutang dalam sekali bayaran perlu mendapatkan pengesahan baki hutang melalui portal rasmi PTPTN di www.ptptn.gov.my atau menghubungi Eksekutif Pemasaran PTPTN mulai **1 November 2021**. Seterusnya, bayaran balik boleh dibuat melalui mana-mana saluran bayaran balik yang disediakan oleh PTPTN.

- ii) Peminjam yang ingin membuat bayaran balik melalui potongan gaji atau debit terus hendaklah membuat permohonan secara dalam talian melalui:
 - a) Potongan gaji di <https://www.ptptn.gov.my/potonggajionline/>
 - b) Debit terus di https://www.ptptn.gov.my/direct_debit/direct_debit.html
- iii) Peminjam yang sedang membuat bayaran balik pinjaman melalui potongan gaji atau debit terus juga layak mendapatkan diskaun 10 peratus tertakluk kepada bayaran balik yang diterima oleh PTPTN mulai 1 November 2021 hingga 30 April 2022.
- iv) Insentif diskaun akan dikemaskini di dalam akaun pinjaman peminjam pada akhir setiap bulan dan peminjam boleh membuat semakan penyata masing-masing mulai tujuh (7) haribulan pada bulan yang berikutnya.

4. PTPTN mengucapkan terima kasih kepada YAB Dato' Sri Ismail Sabri Yaakob, Perdana Menteri Malaysia dan YB Senator Tengku Datuk Seri Utama Zafrul Tengku Abdul Aziz, Menteri Kewangan Malaysia di atas persetujuan untuk pemberian insentif diskaun bayaran balik kepada peminjam PTPTN dalam Belanjawan 2022. Insentif diskaun bayaran balik yang diumumkan ini akan memberi manfaat kepada 1.67 juta peminjam. Ini menunjukkan Kerajaan dan PTPTN sentiasa prihatin kepada para peminjam PTPTN terutamanya ketika pandemik Covid-19 masih melanda negara.

5. PTPTN sebagai agensi di bawah Kementerian Pengajian Tinggi (KPT) berharap agar para peminjam akan terus menyokong usaha Kerajaan dalam melestarikan dana pembiayaan pendidikan dengan melaksanakan tanggungjawab membayar balik pinjaman untuk masa depan pendidikan generasi akan datang. PTPTN sentiasa komited dan bersedia untuk membantu peminjam selaras dengan inisiatif #PTPTNSediaBantu. Untuk sebarang pertanyaan, peminjam boleh melayari portal rasmi PTPTN melalui www.ptptn.gov.my di ruangan Soalan Lazim mulai **1 November 2021** atau menghubungi PTPTN melalui saluran berikut :

- *Careline* PTPTN di 03 - 2193 3000
(Beroperasi Isnin hingga Jumaat, jam 9.00 pagi hingga 5.00 petang)
- *Live Chat* di www.ptptn.gov.my
- e-Aduan di <https://eaduan.ptptn.gov.my/>
- Eksekutif Pemasaran PTPTN di <https://www.ptptn.gov.my/hubungi-ptptn>
- Media Sosial Rasmi Perbadanan Tabung Pendidikan Tinggi Nasional

Perbadanan Tabung Pendidikan Tinggi Nasional (PTPTN)

30 Oktober 2021